



MINISTARSTVO VANJSKIH POSLOVA

Broj:

Podgorica, 10. novembar 2023.

IZVJEŠTAJ

o učešću ministra vanjskih poslova dr Filipa Ivanovića na ministarskoj konferenciji „Veća, jača Unija – učiniti EU spremnom za proširenje i zemlje kandidate spremnim za pristupanje“, Berlin, 2. novembar 2023.

Na poziv savezne ministarke vanjskih poslova Njemačke Analene Berбок, ministar vanjskih poslova dr Filip Ivanović učestvovao je na ministarskoj konferenciji „Veća, jača Unija – učiniti EU spremnom za proširenje i zemlje kandidate spremne za pristupanje“, koja je održana 2. novembra 2023. u Berlinu. Osim ministra Ivanovića, u delegaciji su bili Zdravko Jovović, otpravnik poslova a.i, Milisav Raspopović iz Generalnog direktorata za EU i Dijana Ralević, II sekretarka u Ambasadi.

Konferencija je okupila dvadesetak ministara vanjskih/evropskih poslova zemalja članica EU i zemalja kandidata, a cilj je bio da se daju novi impulsi ideji jačanja struktura EU u cilju bolje pripremljenosti za nova proširenja.

Otvarajući konferenciju, ministarka **Berбок** je istakla da postoji konsenzus unutar EU oko politike proširenja. To je, kako je ocijenila, geopolitička posledica agresorskog rata Rusije protiv Ukrajine. Ali, kako je kazala, proširena EU će biti jača samo ako način na koji Unija funkcioniše bude revidiran, uz ocjenu da taj posao neće biti lak. Podsjetila je da su šefovi država i vlada na neformalnom sastanku ES u Granadi dogovorili da se pokrene reformski proces koji će teći paralelno sa procesom proširenja

Na kraju, ukazala da za zemlje kandidate već godinama postoji jasna mapa puta reformi, sa procesima, metodologijama i obavezama izvještavanja, dok za unutrašnje reforme u EU još ne postoji mapa puta, te da je, u tom cilju, potrebno identifikovati konkretne prioritete za reforme kojima se treba baviti u narednih nekoliko godina

Tokom izlaganja na radnoj grupi posvećenoj proširenju EU, ministar **Ivanović** je zahvalio ministarki **Berбок** na inicijativi da se o politici proširenja, ključnoj za Crnu Goru, ali i ostale zemlje Zapadnog Balkana, razgovara sveobuhvatno i fokusirano, na visokom nivou. Ukazao je na polarizovanu geopolitičku konfiguraciju u svijetu ocijenivši da, upravo zbog toga, politiku proširenja treba dodatno osnažiti. Naglasio i

da reforme koje sprovodimo treba da idu ruku pod ruku sa politikom proširenja, koja je jedna od najuspješnijih politika EU, te da je Crna Gora, kao zemlja koja je prešla dug put u procesu integracije, spremna da napravi jasan i konkretan iskorak na putu ka EU, u skladu sa principom napredovanja prema zaslugama. Apostrofirao takođe da je Crna Gora izabrala novu, istinski proevropsku Vladu, koja ima šansu da ubrza pregovarački proces sa EU u korist građana Crne Gore. U tom kontekstu, izrazio uvjerenje da ćemo uskoro finalizovati tekuće reforme u pravosuđu i posvetiti se postizanju napretka u oblasti vladavine prava, te iskazao zahvalnost na podršci naših evropskih partnera.

Tokom diskusije koja bila otvorena za javnost, ministarka vanjskih poslova Slovenije Tanja Fajon je iskazala podršku proširenju EU, istakavši da nova geopolitička realnost dala novi zamah proširenju, koje postalo geostrateški prioritet.

Ministar vanjskih poslova Sjeverne Makedonije **Bujar Osmani** je istakao da integracija zemalja Zapadnog Balkana mora početi sada i biti finalizovana punopravnim članstvom.

Ministar vanjskih poslova Ukrajine **Dmitro Kuleba** je istakao da proširenje jedini način da EU postane jača, kao i da će Ukrajina postati dodatna vrijednost a ne teret za EU.

Tokom boravka u Berlinu, ministar Ivanović je imao razgovore sa ministrima vanjskih poslova Njemačke **Analenom Berбок**, Austrije **Aleksandrom Šalenbergom**, Slovenije **Tanjom Fajon**, Hrvatske **Gordanom Grlićem Radmanom**, Gruzije **Ilijom Darčiašvilijem**, Poljske **Zbignjevom Rauom**, Letonije **Krišjanisom Karinšom**, te ministarkom za evropske poslove Francuske **Lorens Bun** i ministarkom za evropske integracije Srbije **Tanjom Miščević**. Pored toga, imao je tete-a-tete susret sa ministrom vanjskih poslova Sjeverne Makedonije **Bujarom Osmanijem** i bilateralni susret sa ministrom vanjskih poslova Ukrajine **Dmitrom Kulebom**, kao i radnu večeru sa specijalnim izaslanikom Vlade Njemačke za zemlje Zapadnog Balkana **Manuelom Zaracinom**.